

Euskararen II. Plana aurkeztu du Gipuzkoako Foru Aldundiak

Foru administrazioaren euskararen erabilera arautuko du

Gipuzkoako Diputazioko II. Euskalduntze Plangintza aurkeztu zuten atzo Koruko Aizarna Euskara eta Kultura diputatuak, Xabier Huizi Euskara zuzendariak eta Joxean Amundarain euskara teknikariak. I. Plangintzaren ostean, langile askok euskara ikasi ondoren egungo plangintza honekin euskararen erabilera arautuko dute Gipuzkoako foru administrazioan hurrengo bost urteotarako.

Iñaki Petxarroman / Donostia

EUSKO Legebiltzarrak joan den urtean onartutako Euskararen Erabilera Plana Administrazioan onartu egin dute Gipuzkoako Foru Diputazioan, eta hurrengo bost urteetarako martxan jarriko dute aurki. Euskararen I. Plangintzaren helburua zen langileak euskalduntzea, eta zeregin hori, hein handi batean, bete egin dutenez, orain falta den pausoa euskara erabiltzen hasia da, gaztelania erabiltzen den baldintza berberetan.

Koruko Aizarna Euskara eta Kultura diputatuak azaldu zenez, ohore bat da beretzat Gasteizko Legebiltzarrak onartutako Administrazioaren Euskararen Erabilerarako Plangintza indarrean jartzen duen lehen administrazio handia izatea Gipuzkoako Diputazioa. Aizarnak esan zuen egungo plangintzaren helburua dela jakintzatik erabilera salto egitea, euskaraz egiten diren eskaera eta tramitazioak zuzenean euskaraz, itzulpen eta atzerapenik gabe, egin ahal izateko.

Egun 1.600 langile ditu Diputazioak, eta, planaren arabera, hirutik bi euskaraz jarduteko gai izango da, alegia, 1.000 langiletik gora plana betetzen denean. Gainera, hainbat sailetan, euskararen erabilerari dagokionez, besteetan baino aurreratuago daudela onartu zuen Aizarna, batik bat, Kultura, Gazteria eta Kirola, Ingurugiro eta Nekazaritza eta

Gizartekintza sailetan. Aizarnak nabarmendu zuen sail horiek dutela harreman gehiena herritarrekin.

Xabier Huizi Euskara zuzendariak esan zuenez, Gipuzkoako Diputazioa berandu iritsi zen Euskararen I. Plangintzara, baina orain bigarren plangintza indarrean jarriko duen lehen administrazio handia izango da. Horretarako, langileen aldetik izan den jarrera baikorra nabarmendu zuten foru ordezkariak, «oso kasu bakan eta pertsonaletan» ez baita lortzerik izan plangintzak eskatzen zuen euskara gaitasuna.

Euskararen erabilera normaltzen ari den hein beretsuan, atzerriko hainbat hizkuntza erabiltzeko eskakizuna ere handitzen ari dela onartu zuen Xabier Huizik, eta, adibidez, frantsesa eta ingelesa gero eta gehiago sartzen ari direla esan zuen. «Ipar Euskal Herriarekin dugun harremana dela-eta bata, eta Internet eta teknologia berrien ondorioz bestea».

Huizik esan zuenez, orain arte euskaraz egin izan diren tramitazioak itzuli izan dira kasu askotan, eta horrek geldotu izan du erantzuna. Bigarren erabilera planak eskaera horiei zuzenean, itzulpenik gabe, erantzun ahal izateko baliabideak jartzeko asmoa du. Besteak beste, zazpi hizkuntz trebatzaile izango dira, Aldundiko funtzionarioei zer hizkuntza mota erabili behar duten erakusteko, eta hizkuntzaren

aldetik izan dezaketen edozein zalantza argitzen laguntzeko. Hala ere, foru ordezkariak onartu zuten trebatzailea bezalako figurek denborarekin desageratzera jo behar dutela, benetako hizkuntz normalkuntza lortzen denean. X



Diputazioko Euskara Saileko ordezkariak atzoko prentsaurrekoan.

EDURNE KOCH

100 milioigarren bidaiaria

...noiz eta non badakigu,
nor oraindik ez...

Badakigu noiz izango den: datorren asteartean, ekainak 23. Ordu zehatza, geltokia eta sarbidea

ere bai. Ezin dizuegu esan, jakina. Hala ere, 100 milioigarren bidaiaria izango den ordua, geltokia

eta sarbidea nola zehaztu ditugun bihar argituko dizuegu.



metro bilbao



Metroa hartuta oso urrun hel zintezke...Lisboaraino

Lurzoruaren Legearen kontra ez da errekurtsorik izango

■ PPK eta EAJk atzera bota zuten IUren eskaera

Efe / Gasteiz

EAJ-K eta PPK IUren legez beste-ko proposamen bati ateak itxi zizkieten atzo Eusko Legebiltzarrean. Hain zuzen ere, IUk proposatu zion Legebiltzarrari igortzeko Jaurilaritzari eskaera bat hark Espainiako Lurzoruaren Legearen kontrako errekurtsioa jartzeko.

EAJk eta PPK azaldu zutenenez, Kongresuan onartutako lege horrek ez du EAEko eskuduntzarik urratzen, IUk proposamenean agertzen zuen bezala. Javier Madrazoren alderdiaren proposamenaren aldeko bozka eman zuten PSE-EEk, EAK eta UAK.

IUren proposamenak zioenez, «Lurzoruaren legeak sartu nahi du hirigintza eredu liberalizatzaile

le eta ekonomizista Euskadirentzat desegokia; baina, eta hori da inportanteena, hirigintza ereduaren inguruko erabakiak hartzea Eusko Legebiltzarrari dagokio bakarrik, eta ez Madrilgo Gorteari».

Alvaro Amann EAJko legebiltzarkideak azaldu zuenez, bere taldeak ez du babestuko errekurtsorik jartzea eskuduntzen inguruan, eskuduntzen arloan lehia- ren bidea hartzea «txarra» dela uste baitu. Amannek «harrigarritzat» jo zuen legearen kontra egiten den kritika, alegia, EAEn eskuduntzak ez errespetatzea; izan ere, legea EAJk, CIUK eta CCk onartu baitzuten. Espainiako Kongresuan hiru talde horiek babesa eman zioten PPK aurkeztutako legeari. X